

摘藻堂四庫全書薈要

集部

欽定四庫全書薈要卷一萬五千八百十六

集部

盤洲文集卷六十六

宋

洪适

撰

致語十八首

天申節道場所回欄塔白語

朱明紀至歌風式對於南薰赤伏告期繞電有光於北
斗方臣鄰之歸美扣老佛以祝釐歸塗正擁於旌旗夾
道願聞於管籥敢駐元戎之乘仍邀使者之車聊喚舞
衫更陳口頌

濯冠沐浴意能虔已萃緇黃介萬年樂備八音浮喜氣
香飄九陌凝祥烟雙旌未用催茸纛四牡何妨款著鞭
夾道邦人方屬目試教舞袖略回旋

前筵祝聖致語

玉衡正而泰階平氣調九夏里社鳴而聖人出節應千
秋共肩戴舜之心遙拜祝堯之請恭惟皇帝陛下龍飛
上治馬化中興聚精會神屈左智右賢之策悅近來遠
同彼疆此界之仁文物歲蕤規模宏遠上瑞併書於史

謀屢豐大播於民謠決天閭而開地垠昆蟲被澤壓月
窟而震日域殊裔向風迓載夙之令辰騰無疆之嘉頌
五帝足六已邁德於商周萬歲者三願齊光於箕翼臣
等歡浮海角想象天顏喜動眉端言成口號

帝暉咫尺照龍楹繞殿嵩呼若震霆朝士班齊鸞步武
仙官瑞集鶴儀形奉觴亦有單于使秉筆應書南極星
遐嶠莫瞻天日表願將湛露等滄溟

對廳致語

如山如阜如岡已祈泰筴以雅以南以籥式侑需觴廣
此上恩行諸督府烟雲絢采草木欣榮恭惟經略鷺序
名臣龍韜元帥治有清節振開元四十年之風民無歎
聲踐孝宣二千石之訓提刑蜚英表著借重澄清服嶺
以南共仰使輅之久遡江而上即迎召節之盼提舶風
期雋明德宇宏達海瀕遐遠幹奇貨於舌人天下中庸
起高芬於鼻祖甫際繞樞之旦同傾拱極之誠賦苹鹿
之三章秩蒲魚之初燕銷金罷鐫既復復以指期鼓瑟

吹笙故樂樂而與衆宜言飲酒所以合歡某等偶預音
家獲趨台祀永歌不足口頌敢陳

時逢化國日舒長解愠風來宇宙涼飛鳧闔祥瞻北極
頌魚錫宴暨南方紛紛人贊元侯德兩兩星舒使者光
來歲廣庭班玉筍斯辰同奉萬年觴

王母隊祝聖致語

流祥光於華渚倬彼成章來仙侶於崑丘欣然上壽恭
惟皇帝陛下粃糠夏子冠冕勛華如星非星如雲非雲

六符輝煥曰暘而暘曰雨而雨五韞叶調帝業等於山
河王度式如金玉比屋迓可封之治殊鄰修不戰之驩
洩洩融融慶承顏於長樂葱葱鬱鬱載望氣於南陽式
逢貫月之辰咸致後天之祝集三島十洲之羽客獻千
秋萬歲之瑞圖宛宛黃虬曾發至尊之笑戔戔戴勝更
羞玉女之珍臣妾等遙望細氊少留綵節輒成口號以
助頌聲

六幕紛紛啓瑞篇非烟深處下芝輶穆王擾擾不謀治

武帝區區空學仙
今代一人真間世
昔時五老與疑年
歡呼亦有南山頌
誰解吹噓上九天

對廳致語

冒海隅之出日
咸愛嵩呼
象天上之需雲
式均京燕
貳觴既舉
廣樂復張
恭惟經略
道貫六經
聲馳九牧
治廣誰如
方慶尹京
將選王尊
提刑典學
淹該賦才
英瑋疊使
華之三組
覈吏事以
六條提舶
珩璜瑞世
之珍杞梓
昂霄之幹
暫煩持節
即覩賜環
參會皇文
之時載賡
帝

武之什是日也日舍東井潮生南溟清籟集而薰風翔
協氣流而景雲爛置九行之法酒禮備侯藩歌萬壽於
聲詩心馳帝闕臣妾逢斯玳席來自瑤池密通台躔可
無口頌

天街蹀躞跨連錢帝念遐萌輟雋賢玉節繡衣三絕席
翠樽瓊輦再開筵筦絃聲動宮商叶雨露恩均草木妍
定有千秋金鑑錄明年親奏御床前

廣西春教致語

地壓坤方仰茸纛撞牙之重月躔青陸正簡車蒐乘之
時鎧甲精明笳簫清亮經略任隆分閫功載寧邊有裴
公文武之材推卻穀詩書之府龍韜豹略折千里之遐
衝鶴膝犀渠賈三軍之餘勇提刑行都九德氣備四時
厲柏寺之霜威夙參鴈鷺持桂林之星節先問豺狼運
使獵秀青箱結知丹宸繡衣刺舉蜚數路之英聲驪駕
轉輸致列營之宿飽式諏日吉同整戎剛銳將鼓行壯
夫劍立取上駟與彼中駟共觀馳逐之能如小巫之見

大巫默寢跳梁之計屢下奇胘之約益振中堅之容雖
問甲兵不至於廟堂豈忘除器蓋事軍旅則聞於俎豆
于以投醪開豫北之芳尊設湘南之勇爵某等未通樂
紀見謂音官敢揆耳言用成口頌

元戎堂上有奇兵樓堞旌旗未易名光接二星瞻使節
令行八桂暢軍聲指揮已定熊羆肅什伍纔分鵝鶴成
威烈遠超銅柱外雕題交趾盡魂驚

道上致語

亘野彌川既歲師干之試闐郭溢郭共瞻方伯之歸經
略烜赫高牙雍容緩帶賞刑兼用不推皮裹陽秋策慮
內充自有胸中兵甲講周官之振旅統粵分以殿藩稍
霽帳前之威願看掌上之舞回弓彎之雙袖翻花簇之
輕茵翩然若飛觀者如堵某等員參四會技愧五窮仰
奉台顏聊陳韻語

廣陌無風柳絮藏征塵不起整戎行洞首纍化青春寂
師乙諧聲白晝長無數冠裳雲塞道兩行鈇鉞雪搖光

英英如此桂林選便合腰金上玉堂

歸府致語

竣事轅門頓兵幕府百將戢驚強之勇三軍書梟俊之
功恭惟經略略妙兩楹政成五袴比屋咸依於慈父御
屏久疏於膚公已繕車徒荐臨歌舞共詫斗南之秀更
多冀北之羣粉白爭妍奏八音而惜日丹青難寫冠五
嶺以矯春某等備數賤工觀光崇仞蕪音自愧口頌敢

陳

凝笳疊鼓壓天南從此邦人作美談北里聲名皆擢秀
東州歌舞總懷慚輕裘坐嘯青油幕積甲高齊碧玉簪
聞道家家賣釵釧武夫歸去亦醺酣

水教致語

樓船習戰始漢室之穿池督府簡師當楚人之競渡雄
飈借勢逸浪迴波恭惟經略文武威風詩書義帥苻澤
併除於囊橐潢池復返於耕桑堂上自有奇兵克隆閭
寄舟中盡為敵國聊試軍鋒提舉龍劔分光蛇珠握寶

中流擊楫志久在於四方當路埋輪權遂兼於三使提
舶英規瑞世懿德照鄰駕傳一封遠矣九華之送

闕樓

四望安然珍異之來式聚星躔同觀戰艦得岑彭露橈
之制收董襲斷紕之功巨劒長鎗如此舟師之勇多櫓
大櫂潛消海孽之謀少停金鼓之聲俯聽筦絃之奏採
昌蒲於古澗令節相逢張螭蝟之華筵甘醪可醉某等
未通西氣稍習南音敢綴耳言輒成口頌

元戎膚使憩胡床寓目舟師夏日長捷比黃頭能輯濯

勇於長鬣取餘皇水中劍影蛟龍避帳下兵威狐兔藏
見說潢池毀多櫓新來歸去事耕桑

歸路致語

巨舸休兵如得周郎之勝通衢返旆共瞻方叔之歸恭
惟經略識邃古今政兼寬猛比屋口談於盛德偷兒膽
落於雄名烈烈舟師置陣匪同於背水娟娟舞技鋪茵
少試於凌波願駐高牙以償衆目某等寅緣短技瞻仰
尊嚴不揆俚言敢陳韻語

油幢紅旆屆通衢共聽歌詩我不誣弭盜初無沈命法
應時誰用辟兵符翻然奮袖回羅綺觀者駢肩足袴襦
早晚天朝盼瑞錦好書珉石遺番禺

會肇慶黃通判樂語

淡墨造化龍之榜舊矣想聞輕車尋展驥之程儼然肯
顧元侯目喜闕為開清尊通判狀元結綠

輝山長離覽仞第策於闕

舉子之上價擅無雙雖書

於十八學士之間識明元二已丹青之得路忽朱紱以

去朝雲外神仙何拘弱水海隅老穉始識魁星我經略
素講芳猷遂諧嘉話既獲同於王事仍密邇於鄰邦欲
遠方歆艷於大名故高會勤渠於縉禮蛺袖看輕飛之
妙翠翹回巧笑之妍汪汪千頃之陂非徒德量油油三
爵之酒方啓歡情某粗習筦絃得瞻履烏心聲欲吐口
頌已成

古錦銜標戶戶知瀛洲準擬上雲達當今便便五經笥
自昔汪汪千頃陂肯向江邊留鷗首莫辭花底罄鴟夷

康沂成詠頌歸詔剥啄相尋後會期

會鄭韓二守樂語

嘉客聯翩合東西之鷁首元戎繾綣列左右之蛾眉商
律既清華筵足樂某官片言寤主善政得民騰茂實於
羅浮介高芬於龔召提封累化已罷盜而買牛當路知
名豈呼卿而問鴈即聞前席遂遙要班某官訟敏憩棠
威伸拔薤荆府見詠於太白潁川留遺於次公廊廟來
詢欲正銅魚之拜兒童相記已謀竹馬之迎行復陟明

宣專歛惠經略式因暇日少接清歡久聞置驛之賢風
承英概更得覲圭之裔來慰別懷舞衫呈回雪之奇歌
扇度過雲之妙藥淵留照不須對影以成三竹葉娛情
莫惜引杯而滿百某等偶緣末妓獲望餘光仰奉指呼
輒成蕪句

江別東西說二賢魚書同拜喜聯翩穉卿風采齊龔遂
延壽規模載潁川玉塵揮談飛玉屑金龜換酒泛金船
莫辭痛飲娛清夜對此中秋璧月天

廣東秋教致語

蕭辰都試益遵武備之常銳旅鼎來益壯戎容之氣方
一新於城堞爰大建於鼓旗赫然威稜崇我方而恭惟
經略智謀輻湊聲譽蘭薰早陪議於樞庭荐制權於邊
閫赭汗致小偷之贖黑端行惡子之誅緩帶輕裘自得
折衝之略撞牙茸纛復臨簡力之秋提舉德備四時學
苞六藝振纓嶺海久攬轡以占星剖竹鄉邦欲懷章而
就道提舉運使青萍擅器赤箭標材卉服芻衣稱皇華

之未有輦車驪駕政軍食之是須知府統制郡寄遠分
祖風善繼名高信布有黃石公一編之書世說關張為
卯金氏萬人之敵幕府既明於甲令武夫咸奮于熊羆
鎧甲鮮明皎如霜雪戈鋌犀利燦彼雲烟控絃有鴟叫
之精畫陣得魚麗之法既陳勇爵斯啓華筵天下大安
烽已沈於丹徼尊前一笑令須卷於白波某等因伍本
牟預瞻巨闕蕪詞自媿口頌敢陳

清秋大試斧尋柯噉咷誰言用楚歌帥閫威名傳籍籍

使臺材業辦多多兵機總是師黃石酒令同看卷白波
見說鄰偷蜂蟻聚遠聞軍政已投戈

歸路致語

擁旆建旗肅爾元戎之令夸銀曳綵欣然猛士之回恭
惟某官道括古今材全文武發伏能張於耳目除姦皆
得其根株已消枹鼓之鳴大洽袴襦之詠三千鐵騎訖
武事於闢場十二金釵舞汜人之妙曲欲副闐郭之瞻
矚不辭按轡以遲留某等未洞八音已窮五技台符在

望韻語載陳

旌旗獵獵戰西風
介冑精明霜與同
擁道共瞻元帥至
折衝誰許十賢功
夸銀拖綵征師喜
迴袖垂螺舞女工
已向黃樞贊籌畫
便應歸侍大明宮

設蕃致語

伏以棲陸隱沙
物八蠻之奇寶
接艫連舳起萬
估之去程
秩此長筵
視諸故事
恭惟經略權尊
牙纛望偃簪紳
繼宋璟盧鈞之
清掩任延錫光
之績德惟善政
除下碇

之苛征利涉大川無揭竿之多櫓提舶素絲厲節紫橐
儲材領重寄於輜軒司殊方之縑賄交番中之舶通遠
客之越鄉校都內之錢藉良籌而富國是日也陽月未
盡陰雲不生嚴風至而北戶寒駭浪伏而南溟晏昔馬
閱貨之宴私彼珠璣今及束裝之時寵之樽俎晞陽之
恩既洽藏市之願可知卉服氎衣已睢盱而就列夷歌
蠻伎蓋蘭閣以同歡

王導拜揚州賓客數百並加需接
惟蠻使未洽因過其前彈指去蘭

閣衆人同笑
四坐並歡

環豐頰之敷腴肆醕醑而茗芋所謂烏許

狼隄之外何獨龍涎象齒之珍發千里萬里之行倍三
之五之之息帆開遙島歸期細數於朱明稠載衆香異
物兼齎於黑暗某等級名顙侶效藝崇堦仰對牙居輒
哦韻頌

艚人指日欲開檣洽此需雲寵遠商奇物試求師子國
去颿穩過大蛇洋銀杯更盡金杯飲黑暗仍兼白暗將
方伯使華清徹底不聞私有橐中裝

會廣西田提刑致語

分繡衣於遐嶠籍甚相傳下文鷗於澄江惠然肯顧初
筵卜晝和氣添香恭惟提刑察院壯志烟高飛談霧卷
擅青萍之利器摘黃絹之好辭蚤甄獎於儒宗久簡知
於法坐齊名屈軼獨彈芟芟之思流惠甘棠願書下下
之考蹈危機於賊窟存陰德於鄉城少寄澄清即歸獻
納瞻二星之次遂借餘光迺三舍之程不忘雅好我經
略命舟問訊除館俟音釋七閩析別之懷覲數日周旋
之款歡情道故契益腆於蘭薰親仁善鄰事可尋於瓜

潤喚縈塵之長袖飄疊縠之輕裾曲撥鶻絃聲紆象板
如淮有酒何慚南董之經并山為肴誠非邾莒之會某
因緣絲竹瞻望壺觴仰奉指呼輒成韻語

北斗南邊雲物明煥然天節仰祥星朝端獬豸曾張膽
道上狐狸已匿形欲奉三章仁遠嶠定知五筦迓虛囷
迓程肯顧交情厚莫惜花前倒綠卮

廣東春教致語

國小大而制軍夙垂邦典歲春秋而講武用赫戎昭緊

嶺海之列藩以番禺為督府屯營之盛斧鉞則雄經略
玉筍重臣銀菟賢牧笑棘門之兒戲紹方叔之祖風百
雉宗成益壯長城之扞五兵素厲洵對菟田之時提舉
提刑比德前英著名先進沃轡見澄清之志天應華星
繡衣無逐捕之權人瞻畏日提舶運使眷深黃屋節厲
素絲總縑賄於巨航蠻琛無藝轉木牛於一路軍食有
餘式簡良辰同親武事耳目在吾旗鼓惟車塵馬跡之
從手足以積機關得弋法劔道之說整我堂堂之陣肅

然暨暨之容予以投醪此焉攝飲其爭也君子實存酌
兕之儀謂濁者賢人斯對揮犀之坐某等未諳樂紀偶
廁音官敢綴耳聞用成口韻

豪竹繁絃振粵臺鬪場雨過淨纖埃台符款曲三揮麈
軍令分明屢舉杯兎窟久空春草出鯨波無事早潮來
已知樽俎遐衝折且欲班勞激趨材

歸路致語

箕張翼舒已嚴終於兵事絲鳴管語致驩接於民心恭

惟經略謀過孫吳政齊召杜禦侮得龍韜之妙撫封無
犬吠之虞帥以門名仰旌旗之遡返家徒壁立傾城郭
以來觀爰進舞腰少凝羣目台躔在望口頌載賸

旌旆搖搖卷碧雲元戎振旅入城闔蜚騰廣譽孚朝野
講肄強兵動鬼神無數冠裳聲聒晝兩行羅綺艷嬌春
看看夜半朝宣室便把金犀換玉麟

盤洲文集卷六十六

欽定四庫全書薈要卷一萬五千八百十七

集部

盤洲文集卷六十七

宋 洪适 撰

致語十四首

天申節道場回欄堦白語

朱光發藻式臨東井之躔碧縷騰芬共祝南山之壽願
裴回於六纛更款曲於二星欲進舞人助成喜氣足音
勿遽口詠已成

垂魚擁笏萃官僚黃宅緇廬再祝堯九夏正中調玉燭

五雲為瑞爛璇霄無勞廣陌張戎幕且駐高牙挽使輶
觀者如牆汗成雨為呼歌舞相歡謠

前筵祝聖致語

天命中興符鬱葱於白水時迎上瑞薦清泚於黃河溥
均湛湛之恩仰贊穰穰之福恭惟皇帝陛下成功一旅
納祉百神系丕緒於綴旒寘懷生於莫枕總綱振領尊
居蠖濩之中越契踰繩何取鴻荒之際久建橐而匡武
同扇暘以垂仁陳六曲而措九刑皇風載遯集五章而

擾一角協氣橫流斯逢里社之鳴共效華封之祝燕鹿
鳴而食苹野式歌小雅之詩嘒瓊華而嚙芝英敢續大
人之賦臣等技慚師乙歡等眊丁敢緝耳言輒成口頌
薰風濯熱自南來陸戢傳聲殿繞雷九奏鳴球陳露瓮
八珍登俎奉天杯鑪烟結篆狻猊噴扇影分行孔雀開
海角無階就堯日但知長曝報恩鯢

對廳致語

五麟七鳳滂照室之榮光百榼千鐘均式圍之廣宴興

情闡懌嘉頌沸騰恭惟經略茹古涵今經文緯武元戎
十乘久隆閫外之權泰階六符當近日邊之列提舉提
刑大雅宏達至德中庸不疑多有平反星虛貫索士安
知所取予海羨牢盆提舉材負能千任優共二巨舟如
島來異寶於殊方流馬在途腐餘糧於高廩式迓瑤光
之慶同霑湛露之恩秩朱紫於初筵吟青黃之雅樂如
澠有酒共瞻拱北之恭并山為肴更獻維南之壽某寅
緣絲竹瞻望簪紳不度俚言敢哦口頌

填然歌頌沸康莊郁郁梢雲晝漏長
禮浹三行盈綠醑樂催百戲擁黃堂
挹泉清節推吳隱攬轡威聲小范滂
來歲同稱千萬壽天顏有喜舉瑤觴

梢雲瑞雲也見江賦

王母隊祝聖致語

非煙非雲瞻祥光而遠集如山如阜介壽祉以同辭
烏三足以前驅璫八琅而競奏恭惟皇帝陛下功崇祀夏
頌誕生商膺錄受符光啟中天之業重規疊矩登閔上
古之時成道德之安強總神明之貺祐東阡北陌屢多

稼以逢年甘露嘉禾無瑞圖之虛月梯航交至文軌大
同邀宓妃玉女之車挹松子王喬之袂嶽呼萬歲納虞
氏之白環觴進九霞獻瑤池之碧藕妾等蒿然布武虔
若貢誠輒吐心聲式颺口號

想像編星拱紫微龍蛇日暖動旌旗恭惟虹瑞生虞帝
遠以鸞驂會宓妃雲氣先飛三足使風紋不皺六銖衣
君王若問蟠桃木溜雨霜皮幾萬圍

對廳致語

震夙慶辰瞻星流於華渚鼎來廣樂洽雲上於羣臣列
坐編珠繁花爍錦經略廷中舊德嶺表長城阜九牧之
民熙然樂業最三年之計行矣趣裝提舉學瞻家傳言
推世則洋洋令聞政司鬻海之權衮衮清班即快昂霄
之志提舶韜藏利器充牣多聞通大牖之越鄉載馳使
牡迺明綸而造闕遂聽朝雞祥對舒虹誠深就日以九
為節拜燕滑之渥恩於萬斯年罄壽臧之善頌妾因逢
玳席少駐羽輪已奏雲璈迺賡口詠

心傾葵藿斗南邊秩秩簪紳再就筵方伯舉杯均舜酒
外臺連壁頌堯年望雲黿拊躍三百音陌指日鷁行官九
遷祕殿此時同廣宴宮花深處拜傳宣

廣東水教致語

揚子之江心鑄劍重午及時越人於水面鬪舟先庚有
令既肯臨於膚使可不召於麴生恭惟經略名簡宸衷
政敷物聽海涉湊歸颿之客山行無擇地之人閭外之
事則制之遐衝已折舟中之指可掬也猛士孔多提刑

氣備四時德翔千仞英聲載路咸警埋輪之威壯志橫
秋久存擊楫之誓提舉襟靈超卓識略高明粟漕盈倉
智過長鞭之算舶商銜舳心期多櫂之消同集樓居俯
觀水戰伐鼓而穹龜踴躍揮戈而畫鷁縱橫羽扇綸巾
酷似周郎之赤壁牙樯錦纜驚回秦地之白鷗葭萌賈
勇以摩肩蒲盜聞聲而落膽投單醪而分飲直可拍浮
嘗角黍以知新便如競渡某等偶階綠竹獲望尊壘敢
綴耳言因成口頌

水戰橫江一百舟，海山樓裏坐元侯。
偷兒已罷三年伎，猛士聊因五月秋。
不用辟兵酬令節，從今行客但安流。
將軍盡列長安第，留取樓船震海頭。

歸路致語

大翼蔽江過博昌，之素習高牙塞道如長岸。
之言旋恭惟經略德浹提封望，崇制閩按五兵於棹卒迎一節於郵籤。
水截潛蛟戢衝星之劍，氣體輕飛燕喚回雪之舞腰。
仰奉台躔存韻語。

州民爭看使君歸千騎闐闐此一時鼠子已知焚大棹
馬人又是建豐碑但將海閣嚴軍政不比湖亭習水嬉
赤壁功成八十萬小喬應奏舞腰支

會汪正字樂語

千里命駕如山陰乘興而來一朝傾壘作河朔避暑之
飲有重客而皆賀况良辰之難并聲沸筦絃光生戟纛
恭惟狀元正字德輝覽鳳奇表匿犀騰鼉采於荆山呈
夜光於隋掌黃甲早魁於多士終賈銷聲青藜夜訪於

老人向歆等譽謝先容之推轂舉後覺以執鞭正垂上
於雲霄却平分於風月餞清督府迺枉道而肯臨入覲
法宮即尊朝而列侍我經略頃聯班綴款挹風猷迨歛
惠於桂林復親仁於泥軾仍年分索憑尺札以搖情此
日從容數寸心而道舊欲娛密坐遂速高軒歌陽春白
雪之詞喚青笠綠簑之舞盼兮美目雖東州莫並於西
州酒有別腸蓋大器難陳於小器某因儕伶竹獲邇召
棠同喜足音輒成口誦

一鳴曾使萬人驚
亘地馳聲若建瓴
此日東州披宿霧
幾年南斗避魁星
共看騏驎騰夷路
便接夔龍侍楚廷
千里尋盟須舉白
海珍無謝五侯鯖

廣東秋教致語

進退辨蠲鏡存周卿之六典
前後中規矩法吳將之五
申時屆清秋令行督府經略
龔黃撫俗頗收總戎偷兒
皆業於火耕估客久聞於露
宿仍年專閫令三出於蕭
辰不日造朝官九遷於拱著
提舉運使學窮竹素德粹

珩璜使指光華疊外臺之五組宸心簡注迎細札之十
行簪盞鬪場鼓行猛士列方圓之陣法角勝負於兵鋒
歌南風而競北風如臨大敵取中駟與彼下駟自有神
機惟熊威虎力之如斯何鼠竊狗偷之敢動式存勇爵
遂秩賓筵七札張弓落孟中之蛇影一夫舞劍變掌上
之蛾眉某等猥筵軍伶獲瞻戎幕共成口頌非敢面諛
八月師田不失時武蠡赳赳震雕題耳批秋竹圖騏驎
鋒瑩朝霜拭鵬鵠連率名高方叔後外臺志與范滂齊

向來佩犢潢池子一一腰鎌走稻畦

歸路致語

壯士負韉如奏班師之凱元戎緩轡益隆禦侮之聲經
略德輩前英政喧輿誦三校中秋之武久勤半夜之思
紅旗尚壓於南荒紫橐即儀於北闕犀渠夾道已收旂
動之威翠袖臨堦却作弓彎之舞台躔在望口韻是賡
旌旄照海塞通達共說元戎校武歸三歲麟符寬遠顧
一方鼠子讐英威征袍劒立嚴師律舞袖弓彎有妓圍

頃刻連營俱解甲室中寧復歎蚍蜉

鹿鳴燕致語

設科選士仰華旦之右文提筆擅場逢有司而定價自
非白璧無瑕之侶安得青錢必中之功惟揚粵之東隅
有張余之芳躅當時勛業能齊色於三階後代宗師屢
標名於千佛羊城是為盛府鴈塔相踵英聲瞻槐斯黃
拾芥而紫勸駕腆元侯之禮開尊承嘉客之歡音沸筦
絃先生韋布恭惟經略詩仙濟美吾道主盟決遣有如

神明潤飾皆以經術已同延壽執俎豆而興校官不減
文翁買刀布以齎計吏提舉望崇嶺表胄出雲間使節
森羅兼總儒林之柄牢盆充牣獨贏歲抄之儲提舶論
議粹醇襟靈開豁典司浪舶每多棲陸之珍涵泳金籛
自有傳家之學喜羣賢之得雋指上國以觀光遂延鄉
社之先鳴且合漕臺之高薦凡舊登於貢籍咸同集於
賓筵所期渾化之榮以激方來之秀宮商間作醴斚交
飛歌鹿鳴之三式侑吸川之飲繁鷺鳥之百孰追擊海

之程某等偶綴賤工獲披崇仞甲科可俟韻語敢陳
采芹東魯浪歌僖領海儒風異昔時學有淵源能貫道文
如藻繡總紬奇軒然西笑騰三級對此南烹舉一庖飭
業權輿自今日廣寒折取最高枝

會肇慶章守致語

遺棠陰於名郡載佩魚符樣桂權於長亭少留熊軾清
尊卜晝和氣回春伏惟某官擢榦鄧林席珍和肆自開
龜而斂惠能去鱷以擅聲仁浹遐萌無尺寸之膚不愛

威清羣吏雖銖兩之姦皆知績既徹於法宮寄遂隆於
潛邸於焉假道得以聚星我經略託契年家仰高仕路
撫封借潤重分鄰燭之光置驛迎來已辦廢芻之費式
開歡席少接綺談列顧景之輕袿進縈塵之長袖如澠
有酒何慚南董之經并山為有誠非邾莒之會某等因
緣鼓吹瞻望壺觴同喜足音敢哦口頌

風翼翔嬉雲路輕合班玉筍直承明鱣溪已作思棠雅
龍邸先馳拔薤聲卓益朱轡仍歛惠青簾白舫豈爭程

元戎政欲傾家釀喚取佳人進麴生

福州會權府趙提刑致語

入疆而瞻使牡既親顯顯之英諏日以合州魚更結承
承之契可無燕豆少款符階恭惟某官嵩岱吐暉淄澠
納度望早推於標的識獨妙於襟靈屢符李邵之占雅
負范滂之志駕輕車於熟路再至閩川鞠茂草於圓扉
一清漢律攝行方伯之事隱若長城之賢我安撫舊仰
高山願披宿霧把麾近鎮遂託部刺史之天視篆黃堂

幸聯大君子之躅欲腆蘭心之好迺開竹葉之尊熒煌
既聚於荀陳靡曼兼娛於鄭衛十眉相顧雖非輕別於
舊官百榼須空此去復拘於三尺某等梨園傳藝柳陌
分營輒綴耳聞敢哦口頌

三山分鼎肖蓬瀛叩首雲達上使星緩帶一年聊疊組
破觚八郡久虛囹元戎自喜聯高躅勝日何妨醉渌醕
雅望不應長攬轡便須筆橐侍天庭

會交代趙知郡致語

非桐不棲下鳳儀於千仞及瓜而代解龜紐於一朝少
駐高軒乃張綺席恭惟某官清襟邁往雅量淵深畢原
鄴邠文之昭見謂金枝之傑江漢濉漳楚之望來分銅
竹之榮惠露所需巫風丕變厖眉五叟欲祖道以攀轅
細札十行即造庭而荷橐交代講英聲於朝野結永好
於子孫方期接踵之初願卜承顏之款清香畫戟載賡
燕寢之詩朝雨輕塵未奏渭城之曲某等侑歡若下濫
吹郢中共集耳言遂成口頌

雪意商量未肯忙使君歸騎已騰驤二年治行留襦袴
萬戶生涯足稻粱便去栽冠登要路誰能截鐙款行裝
胸中久矣吐雲夢一舉瓊桑有別腸

盤洲文集卷六十七

欽定四庫全書薈要卷一萬五千八百十八集部

盤洲文集卷六十八

宋 洪适 撰

上梁文七首

東湖上梁文

東海變為桑田漫作千年之調西山致有爽氣遂萌三
徑之心顧窮人一事之難成宜智叟旁觀而大笑于洪
子生於浙右望出江東泛宅浮家歎萍蓬之無定架巖
劉壑懷桑梓之必恭悼木偶以何之騎土牛而甚鈍周

子至止非假步於山扃陶令歸來聊結廬於人境繞樹
靡勞於三匝棲林姑遂於一巢因高城以為垣墉挹層
巒而開戶牖平湖湛綠聞漁父之扣船斜照穿紅見樵
夫之弛擔方將買竹萬箇栽桃百科却師乙之誨筦絃
課畦丁以治菰韭東鄰西舍接封胡羯末之遊右粥左
餐軼許史金張之樂迺諏吉日式舉脩梁少述襟懷併
申頌禱

拋梁東三竿初日拂牕紅盤中苜蓿朝朝是架上文書

不療窮

南芳蘭手植茁新簪老萊便作斑衣戲日日循陔奉旨甘

西翼翼鄰牆萬瓦齊風至初無塵翳面不妨揮扇步桃蹊

北喜見邊亭烽燧熄八荒壽域一時開處處樓臺鉏枳棘

上郁郁非烟騰萬狀一天黃鵠自高飛舊日銀河仍在

望

下愛竹子猷今不借已開虛牖納清陰更待高蟬吟永
夏

伏願上梁之後人皆奠枕門不呼醫逐柳州之一貧送
韓公之五鬼造化小兒不相戲梁上君子非所憂父子
團欒問寢奏南風之曲弟兄笑語對床哦夜雨之詩

廣州緩帶堂上梁文

巨樞就斲得夾塏於守居緩帶揭名壯遐邇之閫寄事

皆中度下不告勞經略撫字慈祥剴裁閒暇庭息鼠牙
之訟茂草鞠靡野無犢佩之人餘糧棲畝飲貪泉而志
潔挹溟漲而量寬治行鮮雙歡謠不一數十處而起提
闕時仰信臣十二月而成輿梁名高子產既新粉堞盡
飾黃堂以棟梁柱石之材運庀楔榑櫨之用獨營心匠
咸聽指揮方沼凝波聞賓蓮之紀瑞高城作屏有喬木
之敷陰將率賓僚時開樽俎胡床之雅興故在投壺而
雅歌甚休深有葦而淺有蒲不減谿堂之樂右持盃而

左持螯可拍酒舡之浮式舉雙枚因成短韻

拋梁東料戾微微曉色通桃李新栽千百本陽春都在
笑談中

南壓枝荔子為誰甘紅蓮池上花爭膩舶上風來客半
酣

西堆案收回紙尾鷺緩帶坐看霞送日枕柳葉底鶉鴝
啼

北粉雉如山扞南國登臨極目望中州便覺歸心生羽

翼

上青草黃茅祛風瘴天末神仙御白雲執轂騎羊會相訪

下撫字心勞歌匪野賣劍歸來不帶牛攜鉏競去尋秧馬

伏願上梁之後牒訴長稀版圖益進歲豐而魚蟹有餘風靜而鷄鶩不近青油幕下少留賓客之談玉筍班中入奉鬼神之問

澹津卜築上梁文

年登半百未皇最爾之居象應魁三甫遂歸與之計方
休它館難緩吾廬澹津主人壯也安貧晚而亨否際真
主風雲之會點明時柱石之班智拙謀身堅白莫齊於
衆口恩深鏤骨懷黃獲返於故鄉念先公之始基為我
里之佳處營置錐之壤何啻買山規納駟之門殆同刻
楮茲契肯堂之志敢辭治第之勞起無地之樓臺固多
慚德對此床之風雨况有善鄰練吉日於歷翁付全謨

於梓匠既安又負可舉棟梁

拋梁東螺洲水轉玉皇宮枉教地識傳前古調鼎曾無
尺寸功

南澹浦彎環玉一潭拂徑已成高柳五當門須要綠槐
三

西鴈序雙簷入望齊步屨同行多樂地夢魂那復到沙
堤

北僅勝詩翁歌偏仄欲營傑閣貯宸奎待向北鄰咨信

息

上不用星官說乾象青天白日是清明凌雨震風休薄
相

下萬軸牙籤重挿架祇將清白遺兒孫剩有門閭容駟
馬

伏願上梁之後鼎飪導和巫醫掃迹華髮慶采繁之助
清尊交常棣之驩七子克家咸守詩書之業諸孫滿坐
長尋棊栗之盟凡我親朋共茲悅喜

楚望樓上梁文

江漢分楚望昔聞騷客之辭西北有高樓茲占蟪蛄之
景工師喜於得木龜筮未嘗違人繩墨既陳鑿枘相合
盤洲老人六年治圃三徑成蹊桃塢梨原雜百花而競
秀溪堂水閣涌雙派以交流戲魚識鳴屐之聲馴鶴顧
隨軒之步復營飛觀以俯西郊慕元龍百尺之名哦孫
楚五尋之賦戀梯雲之新級如履坦塗試耿雪之曲欄
已橫斜影縱目而天光無際怡顏而日力有餘丘壑足

以起予草木誰不知我旁瞻廬阜納爽氣於櫺楹前對
鄱池發長謳於輯濯將以登臨之暇時乎醺勸之娛從
他燈火下歌臺且向園林窮勝事舞低楊柳月久灰年
少之心棲老鳳凰枝獨結歲寒之友脩梁升也短韻來
歟

拋梁東雉堞連延紫極宮漁子入關爭蚤市艫人擊水
快晴風

南萬頃風煙性所耽細草重茵春亘野澄江橫練月闌

潭

西天際匡廬入望低
棣萼樓臺財尺五
瘦筇來往印長堤

北美竹如椽
瀟洒國巢雲
上下啓軒窓
一覽芝山盈秀色

上落霞孤鶩供清賞
一聲長笛倚欄時
待得蟾光紫蕙帳

下剩作茅廬容櫪馬
藕花開後羽觴頻
風掩郊扉回俗

駕

伏願上梁之後日涉而風雨不渝雲卧而神仙可學筍
菹魚醢進野老之晨羞羽衣虹裳邀仙妃而夜話其誰
歌馬同我盟鷗俛仰之間咏歌不足

花信亭上梁文

歷載買山方策勲於此日羣芳得地有報喜之祥風乃
作新亭用酬勝槩盤洲老人酷好行樂雅知倦游治盤
洲百畝之園費中户十家之產物非容易而盡獲事或

艱難而晚成東閣西樓僅有一牛鳴之隔左花右竹幾
乎兩蝸角之爭弗蒂芥於胸中若羈縻於化外灰心久
矣唾手得之胡越為一家無爾界此疆之異雲夢吞九
澤合遠山近水之奇草木皆知燕雀相賀畫棟侈丹青
之飾雕欄呈紅紫之妍四時携酒則親朋足以娛嬉千
里命駕則故舊斯焉款曲野無青草擁春徑之名葩鞠
有黃華送秋林之清馥閱冬蒨夏敷之相繼任朝榮暮
落之自然已架虹梁須吟繭紙

拋梁東日日來占花徑風長把芬香迎杖履不將消息
倩鱗鴻

南芍藥留春不脫驂夾岸夫容爭濯錦雙頭倒影媚澄
潭

西丹桂盈林菊遶畦霜始降時花恨老憂能忘處草慚
低

北鷗思從容魚足食梅花滿眼雪花飄玉骨冰肌同一
色

上東盼雙溪西楚望稍疎問訊竹平安貪看穿花蝶來
往

下蘭蕙叢卑宜在野閒拵花史傍闌干我欲雌黃賡演

雅

陸魯望作花史

伏願上梁之後風光益好樂事不衰三百六旬而歲成
常常乘興二十四番之花信一一飄香凡我同盟逢場
作戲

容膝齋上梁文

寸地休心或發置錐之誚數椽容膝大勝環堵之居非

坐井以觀天猶乘槎而問漢宋桷但求於細木門閭不
納於高車斤斧論功龜魚薦瑞盤洲老人技窮知止興
盡倦飛半百年而日苦無多又踰十稔九萬里而風斯
在下安敢肆言鷦鷯不過於一枝鳳凰始翔於千仞因
山之麓倚竹為廬每駐屐而少留必橫琴而獨樂塵外
欲招夫五老飲中難著於八仙抵掌而談不出柳州之
景曲肱而枕可尋蟻垤之游晝掩卷以盟鷗夜舉杯而

勸月小以成小斯焉取斯霧塞華棖沈沈者所以敗也
風生圭竇綽綽然有餘裕哉雖不上梁何妨下筆

齋之東九曲雙溪在眼中人世最難開口笑興來寧惜
酒尊空

南斗大生涯亦可貪仙島有名誰得到箇中真趣上登
三

西矮桃得地漸成蹊游鯢自逐天池樂此處相忘尺澤
鯢

北坐看蠻觸干戈息度地休吟葛屨詩開疆盡掃槐安國

上芥納須彌非說妄淺中狹見小丈夫豈識汪汪千頃量

下何必萬間謀廣廈南牕翹足傲孤松北垞轉頭無片瓦

伏願落成之後四時常健一室易安危坐蒲團烏有髀消之患徐行草徑更無股栗之憂凡今之人與我共此

聚螢齋上梁文

三葉決科更編花萼之集一經趾美常慕桂芳之詩月
兔未明風螢可聚授諸梓匠建此山房盤洲老人世禪
儒冠室標藝苑演綸鼇禁仍父子者四人結綬鵷行踵
弟兄於二府兒輩久聞於師說孫枝半離於童蒙欲增
門戶之輝須佩輪輿之戒念焚膏而繼晷尚鑿壁以偷
光肄業能勤策勲可必張口如坐雲霧雖懷繡簪笏以
徒然聽履而上星辰盡燈火簡編之所致莫惜數年之

苦學誓圖千佛之榮名良弓之子必為箕有心相續強
弩之末不穿縞勉力有終茲頓雙枚試聽六詠

拋梁東一生窮達卜童蒙拚却數年稽古力拾青拖紫
笑談中

南燒燭尋書到草菴月練縈牕如白晝牙籤插架好窮
探

西景到桑榆漫噬臍趣取光輝對黃卷任他簷外玉繩
低

北更漏迢迢天又黑短檠參用也無嫌莫使凝塵棄牆側

上萬點飛星迷四望案頭乾死可憐渠人倦欲眠渠亦放

下可但膏油額五夜清霜十月歎飄零便有雪花相假借

伏願上梁之後筆耕不輟書癖休醫詩禮承家長作蟾宮之想朝昏挾策無貽螢燭之羞傳之雲笈味我藥石



盤洲文集卷六十八



總校官進士臣胡榮

校對官編修臣周厚輅

謄錄監生臣徐掄元

欽定四庫全書薈要

集部

盤洲文集卷六十九至
七十一

詳校官助教臣謝登雋



欽定四庫全書薈要卷一萬五千八百十九

集部

盤洲文集卷六十九

宋 洪适 撰

青詞二十一首

代保安青詞



修禳謝之儀少瀝歸投之悃伏念臣蠢愚有素攝衛失
經灾積在身瘍生於背纏綿枕席亦既兩旬更易醫巫
備攻五毒氣羸則甚疾腫不衰深虞俯仰之間積有神

明之譴博詢巧歷謂熒惑方舍於限宮私念暮年正甲子方周於歲紀顧憂陰罰難遣沉疴輒控危衷洎陳清醮伏願高穹降祉列聖興哀畀以百生更駐桑榆之景起之九死庶收藥石之功

代為子謝安青詞

天道無親罔間衡茅之陋靈心允荅敢修蕙藻之恭上瀆高明采深戰懼伏念臣男稟生孱弱賦命迍邅疾在脾經腫已形於顏面醫窮脈訣危幾至於膏肓當鳩車

兜齒之年進鵝管乳丹之藥保茲赤子實憂似續之微
禱於皇天遂底安平之慶不忘豺獺之報少殫狗馬之
心清選嘉辰聿嚴寶供延瓊臺之真侶按琳札之冲科
伏願飈馭回光凶星退舍日窮于次月窮於紀前迓春
祺膽不受怕心不受邪遂消厄會

鄉城禳火青詞

愆陽易節方迎萬彙之通濫熾降災敢後四墉之祝輒
披丹悃仰叩蒼穹伏念臣等結屋鄉城連牆里巷惟時

賜之既久致就燥以屢驚出糜竺之財難乎苟免激樂
已之酒今也未聞慮炎炎或致於延燒皆惴惴不遑於
寧處况經冬之無宿雪恐涉春復苦沉疴爰修回祿之
禳更弭大陵之氣物雖慚於玉璫儀實按於金科庶消
耄稚之殃願安心味之食伏願高真隕祉列曜垂光脫
焦頭爛額之憂賜飽食煖衣之佚永供萬斛長依壬癸
之神疾去六淫不患陰陽之寇

為大人禳謝青詞

陟岵思親恨循陔之甚邈開緘聞疾欲嘗藥以無繇不
勝人子之情遂瀆皇天之聽果蒙陰相敢控微誠伏念
臣父頃以臺評謫於嶺表逢魑遇魅久窺白澤之圖茹
蠱踐蛇致苦黃茅之瘴初傳消息采劇驚惶肱三折以
無醫腸九回而終日謀之卜筮厄有星辰輒披懇禱之
私即迓安平之喜惟祭魚之匪報爰舍肉而有所恭卜
良辰肅陳妙供伏願凶躔轉禍淵鑒發祥土地所宜奠
適調於南食雷雨作解早整頓於北轅

廣州獄空青詞

陽舒陰慘蓋禁民有三尺之科訟息刑清偶闔郡無一人之獄仰上靈之徧覆冀下悃以潛通竊念九州不盡衡山百粵本同荒服惟羊城之劇鎮處鯨海之上游蠻蛋雜居常起鬪爭之事魚鹽逐利易興掠奪之謀多有重辜號為難治臣自叨符竹力念簡書惟措刑不用四十年豈古今之頓異故要囚服念五六日雖大小之必親仰體好生幸無殃死積下旬之決遣致三院之空虛

爰擇良辰肅陳淨醮按多儀於琳札誦密語於琅函度
既往之沉寃迎將來之景貺伏願飈輪來格淵鑒俯臨
憫此無知使之丕變遷善滅罪不煩磔鼠之詞易俗移
風永絕帶牛之習

代為妻保安青詞

上帝監觀回吉凶影響之速下臣激切揭齋戒沐浴之
虔敢控丹誠仰塵洪覆伏念臣妻行年災蹇惡曜照臨
自抵仙羊之城常有河魚之疾節宣既爽防嵐毒以焦

心疼廼相攻忽風淫之在足不勝呻吟之苦遂萌祈謝
之謀履地未能呼天而禱蕙門戶亦多於坎珂致巫醫
不絕於往來肅簡端辰洎陳清醮伏望俯垂淵鑒爲退
殃躔起此沉疴獲臻勿藥之喜錫之景福共保如茨之
休

大人保安青詞

受生天地之中夙憑覆載請命星辰之下願賜哀矜虔
即醮筵輒披愚悃伏念臣稟資窮薄涉世遭迴自竄南

荒於今五稔山河乖異惟瘴毒之滿前魑魅逢迎致風
淫之中左手攣足廢氣耗神昏汗多不可見寒食少無
以自養每視蔭以度日將臥蓐以周星良醫弗值於折
肱沉疴何由而去體詢求巫卜推測吉凶謂羅睺臨照
於命宮而熒惑遲留於厄度迨仲秋之換節方列曜以
回光不勝祈禱之私預肅禴禳之具念陋邦莫能備物
賴淵鑒有以享誠揔真適屆於中元徵福庸殫於下地
冀臻景貺獲度災時伏望上帝假年衆靈轉禍憐臣身

久困於蠻貊察臣行無負於神明俯寬潢潦之誅特駐
峰嶷之景脫孱軀於醜地迎大青之渥恩末疾有痊得
此蹒跚之躓故鄉在望庶能匍匐而歸

廣州獄空青詞

土木營繕嘗虞妖禁之干陞釵寂寥悉自神明之相肅
陳清醮併瀝微衷伏念臣典郡於斯更冬已再頃因海
颶致區屋之飄摧復有隣偷念城垣之傾圯遵一日必
葺之戒玩重門待暴之文既揆日以落成慮興工而有

犯蕪遠嶠浸臻於俗易故仍年再格於園空恐其畫地
為牢猶有哭林之鬼輒伸禳謝敢貢懇祈伏望列聖隤
祥高靈委鑒俾風災之息患冀暘雨之叶時盜賊不萌
鞠室長閒於三木瘡痍自弭歡謠俱決於四民

大人生朝設醮青詞

寢瘵計窮不避再三之瀆籲空情切庶祈萬一之哀盡
瀝危衷仰干仁覆伏念臣自嬰滯疾再涉隆冬足不良
行如遇股夷之踪手無所措豈知指運之能既度日以

減餐常通宵而奪寐怔忡自失廢錮是憂居此炎荒闕
然良劑猶賴神明之護尚容喘息之延斯屆初生敢陳
清醮居瘴鄉之俗而不免固陋庶蘊藻之信而可以揭
虔伏願淵鑒流祥殃星退舍憫其困阨賜以安平遭史
扁之高醫復邯鄲之故步念痿人不忘起早脫舊疴瞻
衡宇以載奔遂迎解澤

代為妻保安青詞

天鑒無親嘗瀝陳於丹款靈心善應非求報於含生仰

瀆高明深深戰越頃以妻夢祥伊始徼福無門向背起居恐觸遊房之禁憂虞生育異逃就館之災獨賴洪私俯垂淵覆果臻如達之喜更協惟熊之占偶奔走於微官致因循於寶供敢消今日併謝後時伏冀列聖協仁大圓融祉數口保團圞之慶窮年無坎坷之憂

大人生朝設醮青詞

射蓬紀旦益驚垂老之衰卧蓐積年不避祈哀之瀆仰干淵鑒曲聽愚衷伏念臣景迫桑榆罪投魑魅自纏綿

於末疾茲經涉於三冬奄奄無聊安否靡知於朝夕蒼
蒼所覆護持猶賴於神明致使孱軀稍能運肘重惟醜
地難遇良醫無飲食奚以扶羸乏湯劑未能起廢復呼
天而有禱冀履地之可期不勝丹款之私敢肅潢汙之
薦伏望帝心融祉星度去灾體脫沉痾早占勿藥之喜
恩歸故里獲享誅茆之居

廣州移右獄青詞

狴牢易地當有事於禴禳土木彌旬可無干於禁忌敢

諷吉日用肅醺筵伏念番禺之城實叅夷夏之俗並海
故輕於為盜穿墉者鮮克畏刑臣罄竭薄材侵尋累歲
雖顓愚之習少革而牒訴之事尚繁蓋三獄連牆或謂
犯陰陽之說致細民觸網罕能臻桎梏之空偶朽椽見
仆於颶風酌衆論遂移於別壤賴萬靈之委貺庶兩造
之息爭迺遵秘笈之儀以落園扉之始伏願明神數佑
列象垂光器廢鈛箠省行露甘棠之聽聲沉枹鼓無鬼
薪白粲之囚

代為闕安青詞

高高在上惟誠款之可通

音混出太玄經

其中無禱祈而

不荅仰瞻威咫尺敢達愚衷伏念臣頃以妻攝衛失經晦
明召疾自踰五嶼凡涉九齡或否或安長有呼醫之事
以朝以夕居多臥蓐之時慮行年易休王之期而厄曜
在衡靈之限致斯災蹇未速痊平嘗丹悃之默投賴紫
清之真蔭遂迎景貺不致沉痾脫瘴癘黃茆之鄉甫居
闕之喜以保孱軀虔卜良辰敷陳薰醺遵金

科之儀式嘽珠筐之洞章伏願照鑒委慈景遊迴馭災
星解退不坎坷以屯如盡室旄倪常團樂而寧止

代保安青詞

大造無私散聰明而臨下微臣有禱憑齋戒以投誠敢
瀝愚衷仰干威咫尺念臣材資涼薄運歷屯遘艱難特
甚於壯年臨照弗迎於吉曜靡瞻匪父尚存鉅痛之創
非此其身又喪下殤之適行藏跋扈思慮乖睽禍不免
於閨房殃更移於臧獲鬼其瞰室醫不離門端由俯仰

之愆遂獲神明之譴謹悼心而謝咎爰請命以乞憐汎
掃罽壇森羅琅簡實賴靈文之力庶幾下悃之通伏望
絃覆垂光凶星退舍團欒數口潜消無妄之災蕩滌滯
冤丕變不祥之事

官舍蓋堂設醮青詞

土木踰旬恐妄干於禁忌斧斤訖事敢虔卜於禴禩仰
扣蒼穹庸披下悃伏念臣叨承君命來領州麾惟是正
堂臨於東序自寇攘而改作垂四十年因災變而不居

隔六七政立三隅之覆壁因兩置以重檐幽暗而不
納天光空虛則殆非人境豈敢忽傾而視陋遂謀去故
而取新目力所營盡更張於戶牖足音相接將旅進於
簪裾茲擇良辰首開醮席伏望靈符發輟乾象吐芒有
覺其楹無復高明之瞰乃安斯寢長興輪奐之觀

妻子保安青詞

呼天去疾從古則然掃地謝恩涓辰有禱敢披悃幅上
瀆高明伏念臣妻宜人妾沈氏頃失理於衛生臣第七

男未免懷而嬰恙巫醫相踵咸無藥石之功卜筮屢占
謂有星辰之院遂投懇款旋獲痊平偶遷徙以還鄉致
稽遲於拜謁念愚息近成於肌熱恐行年未脫於身災
不勝舐犢之情併展祭魚之報庶迎景貺即弭餘殃方
瓊笈之森羅冀飈輪之降格伏望高真殯祉惡曜韜光
先春後秋俱團樂而聚首弱妻稚子免咄咀之關心

會稽謝土青詞

土木興工恐妄干於禁忌斧斤訖事敢虔卜於禳禳仰

扣威尊用披忱悃伏念臣官居偏窄地勢拘牽薰風自
南無復追涼之所時雨將降每懷中濕之憂因增下以
為高遂圖新而改舊所虞穿鑿以速咎殃或方隅乖避
就之宜在神禁有犯干之罪落成之際醮謝爲先乃按
真科肅延清馭伏望高真委鑒列曜垂光吏牘少休賓
案獲盍簪之款醫經可弃妻孥迎高枕之祥

祈晴青詞

上天之載惟播物以無私苦雨數來斯叩閭而有禱高

明匪邈肝蠶可通伏念臣所守稽山是為澤國每博詢
於農事蓋常患於水災儻一年不獲有秋則庶民無以
卒歲茲累月愁霖之沍作致大田多稼之瘠傷雖屢走
於羣祠迄未消於疹氣迺蠲郡宇恭設醮筵仗仙泚之
真官講冲科之祕式伏望圓穹錫祉列曜垂光翻手為
雲弗使陰霾之積舉頭見日遂無凶歉之憂

澹津卜築青詞

卜築澹津實虔遵於先志用工累歲豈無犯於凶神欲

保入寧敢伸祈謝伏念臣頃因罷相再獲還鄉迺興土木之謀以爲風雨之庇前簷後廡幸略就於規模右築左穿恐妄干於禁忌已享一區之佚久稽百拜之儀茲肅清壇仰酌洪覆伏望高真委鑒吉曜垂光老稚伸眉長受如茨之祉巫醫掃迹自臻勿藥之休

萊國保安青詞

矯首清穹惟包函之罔間傾心洪造庶肝蠶之可通敬布微悰仰祈淵覆伏念臣妻沈氏頃節宣之嬰恙嘗齋

戒以勾憐浸閱歲時有稽醮謝茲中春之在候忽右體
之不仁衆劑俱投六旬未効慮行年之蹇剥有惡曜之
照臨或土功侵犯於神祇致風氣纏綿於手足法筮斯
啓景貺是迎伏望列聖垂光災星退舍良方相值早收
勿藥之功末疾有瘳復治采藥之職

謝土青詞

九載營巢蓋屢興於土木一區按堵已久散於工庸雖
幷幪寬風雨之憂恐禁忌犯陰陽之說仰祈洪覆敬瀝

丹衷伏念臣子舍既多孫枝亦衆自頃年之罷相歸故里以謀居梁棟楹間架浸緜於歲月斧斤畚鍤方隅或觸於神示豈云凝燕寢之香僅爾列蜂房之牖失細推於三白嘗輕犯於九良獨被隆恩不生奇禍大懼禴禳之緩妄希蕩滌之私今日是諏清醮斯啟伏望皇乾委鑒吉曜垂光既革故以除殃願履端而受祉盤跚病婦尋故步而早安糾合童孫對衰顏而長樂

盤洲文集卷六十九

欽定四庫全書薈要卷一萬五千八百二十

集部

盤洲文集卷七十

宋 洪适 撰

疏文四十一首

乾龍節功德疏二

四月維夏有開甲觀之祥千歲為春遙罄華封之祝淵
聖皇帝伏願橫流福物順履泰亨問襄野之塗復迴天
步賜紫皇之藥增夢帝齡

丙丁統日瞻華渚之流光甲子疑年指大椿而齊壽淵

聖皇帝伏願金僊助順琳札與齡重易六爻將利艱於
美里受天百祿遂問道於廣成

天申節功德疏二

舒虹爍電日臨東井之躔亘地罄天人獻南山之頌敢
憑蓬築仰介楓宸恭惟皇帝陛下高步皇衢重恢帝載
剽甲兵而不用隱旒纁以無為德及淵泉二儀與之比
大功光祖禰六籍所不能談式對誕彌同祈難老伏願
休符錫美瑞牒歲莖壽考用增不數與三之夢本支烏

奕有開則百之祥

赤伏闔符光啓中天之運朱明紀至亶遙貫月之辰哀
淨宇之緇黃增祥輝於箕翼恭惟皇帝陛下詩賡瑞鳥
業濟時龍帝幄求衣常夙興而聽政邊城靜柝久晏閑
以結盟慶河海之安瀾洽昆蟲而被澤時哉震夙人也
謳吟伏願佛老護持乾坤長久繼天爲子覆禹貢之山
川夢帝與齡邁周王之壽考

天申節功德疏

天有三辰誕紀虹流之慶山稱萬歲爭馳鰲抃之情繡
蓬貝之祕文介岡陵之曼壽皇帝陛下伏願榮光旁燭
福物來崇題南斗之長生等西方之無量舉蒼舒而去
檣杙永振乾綱廝伯僑而役美門遠超仙籍

天申節開啟疏

挺賓數七和哉玉燭之時嵩嶽呼三清矣黃河之瑞仰
憑梵貝少効涓塵太上皇帝陛下伏願翕受頌聲橫流
福物齊蹤邃古較堯舜以錙銖尚齒列僊笑喬松之呼

吸

湍散疏

天有三辰實紀虹流之慶山稱萬歲爭馳鼇抃之情窮
貝藏之祕文衍楓宸之曼壽太上皇帝陛下伏願榮光
旁燭福物來崇瞻金闕之殊祥鼎來戩穀受玉卮之綢
禮永對懽謠

會慶節功德疏三

爲天下君光啟蟬連之業祝聖人壽率同獸舞之歡虔

叩梵宮仰祈泰筴皇帝陛下伏願畢臻百福丕冒八荒
何必學仙求蓬萊安期之屬自然享國過高宗祖甲之
年

非煙非雲騰神光而載夙如山如阜祈壽筴以同辭皇
帝陛下伏願蓮相凝符貝編集福五帝足六已邁德於
商周萬歲者三更垂鴻於箕翼

皇乾眷命誕明主以中興良月就盈增祕篇之上壽更
憑寶梵用祝遐齡皇帝陛下伏願聖與天通福如川至

五十而慕父母益重舜德之華八千以為春秋共獻蒙
園之頌

南華齋羅漢疏并序

紹興二十年十二月一日舟泊虔州夢至一古屋下
忽街中水深沒膝不可出遂登屋行數十步有編
大竹爲高牆隨行人皆自彼下街予畏不敢進遂回
復入屋下過一處如人書室有文書委地返顧尚有
一介相隨予將出戶見隨行者取文書已盈抱予恐

其外有人令弃之既出户見堂屋下有數人坐於地以白輕紗爲衣如深衣然柱間皆貼紙畫人物予意其家有學畫者既過堂前見數房內帳幕皆是墨畫人物已過數間因駐足視之乃地獄罪人變相予方知是冥府復行入後廊下欲出無計因就地坐閉目誦佛覺有小介蟲如大黑豆然綴粘衣上拂之不去忽聞人相笑聲遂開目復行諸蟲自落直後有橫屋地形頗高最後簷際數尺見天如鑿山作屋地者至

彼見其上有一僧屋下有穴數十予問僧求出僧
指云入穴中閉目即可出矣予問既出以何爲報僧
云何以報爲予再扣之即云只齋羅漢亦無所費予
曰當作報誰僧云但言回施六親眷屬予入穴覺其
中皆是沙努力以下頗如今之砌臺不覺擦平處而
寤

一夢入冥念欲歸之無計六親指路如已死而復蘇淨
記當時之言虔修開士之供因仍攝事答謝愆期仰冀

慈悲曲生歡喜

饒州歲會道場疏

南楚名邦盈鄧居之萬室暮春良日崇賽具於羣神歷
甲子之一終繇戊辰之三會初心無怠大報益虔掃寶
剎以妥靈扣琳宮而徼福驅厲鬼兮山之左共祈奠枕
之安祀盤庚於門之西那復濟帷之患式修故事願出
餘財

廣州獄空道場疏

五羊都會抵重罪者居多三院空虛傳昔年之未有仰
真乘之庇護肅實相以薰崇伏念此邦瀕於大海逐魚
鹽於多漿易萌剽竊之謀雜蠻蜚於齊民常有鬭爭之
事誣是非於駛舌輕性命於鴻毛某自佩郡章不留庭
訟念草艾獸獮豈仁政之宜為然養禾傷即姦渠之
浸長每原情而用法不任意以逞刑仰體好生敢令瘦
死政非成於五月獄偶無於一人爰啟梵筵廣搜貝藏
拔沉寃於既往嚴淨福以無邊伏願慧劍解割於惡纏

法炬開明於善地慈悲所化永無犢佩之羣遠邇可封
不必鼠墉之聽

廣州獄空道場疏

遐萌丕變浸消囂訟之風幽圉屢空悉自法雲之護適
當開歲爰啟梵筵伏念某典郡於斯踰冬已再訪遊禽
於絕澗每戒深文鞠茂草於園扉游臻善効尚虞析摺
之下或有檻牢之冤仰賴慈悲為之洗滌伏願刑章益
措無重罪之繫囚慧力無邊躋斯民於壽域

廣州禱晴疏

田疇將穫既屢苦於愁霖鄧市無聊亦難營於飽食爰
裒淨侶仰扣上靈伏願陰隲下民導迎善氣積霾解駁
無翻手以為雲圓象清明遂舉頭而見日

謝晴疏

沉陰弗解實懷苦雨之憂慧力無邊遂啟清暘之禱方
鑪煙之上達已氛曠之四除恩則甚深報於何有更祈
慈覆益庇含生

謝雪疏

五日為期即獲同雲之慶千巖俱白載瞻積雪之祥稽
首陳詞齋心拜況尚邀帝力終佑民編

禱晴疏

田家作苦懼雨勢之傷麴蠶事既登待日華而收繭惟
霖淫之未已輒齋洗而有祈伏望淵鑒弗違積陰丕變
副此下民之望賜之旬日之暘庶無偃仆之秀岐可以
縱橫於巧織

謝晴疏

翻手為雲致織婦耕男之愁歎舉頭見日快牛童馬走
之清明豈涼德之能然顧厖恩而何報更期時若以及
秋成

謝雨疏

踰旬不雨正懷旱暵之憂卜日扣閤即獲雲霓之應連
緜甘霖霑足多田吏逃失職之愆農有逢年之喜恩將
何報言不能宣天且不違願終十雨五風之惠人之所

欲庶底千倉萬箱之收

禱雪疏

歲聿云暮未瞻積雪之祥天且弗違願賜同雲之慶爰
趨丹宇叅露赤情冀三白之應時免大陵之作沴

設廳請觀音禱晴疏

一秋常雨既屢控於禱祈千手大悲豈不憐其饑饉念
多稼已傷而無幾顧來麴未播而可憂儻霽霈之弗休
將流亡而莫救敢迎妙相來憇黃堂願廣布於法雲即

盡驅於沴氣庶使提封之衆免淪草野之凶

謝晴疏

叩蓮宮而禱請虔奉緝容掃棠舍以莊嚴敬披丹悃惟
回天之有力能出日以開明解四境之怨咨副九衢之
瞻仰慧光所燭願長運於慈悲禾秉有遺庶少扶於凍
餒

水陸疏

千燈之叢一室不異一燈一月之照千江便成千月物

理如是佛法固然伏念荆門頃遭厄會或家居於劇盜
或命絕於凶年或折骸於竈觚鼎耳之旁或喋血於車
輪馬足之下豚無掩豆若教氏之鬼長饑瓜不表犀冥
漠君之冢何在既沉魂之未拔宜和氣之弗克凡此遺
民殆非平日竹籬茆舍常濫暎之相驚白叟黃童亦四
時之有疾欲求不盡之福迺肅無遮之筵伏望一切虛
空四維上下廣大雲之法蔭同作證明變甘露之珍羞
率令飽滿一郡得沾於樂果三塗永脫於迷津仰冀覺

慈曲垂洞鑑

芝山水陸疏

買山作圃雖久閱於歲時畫地種花已粗成於畦徑念
開鋤於積土或傷犯於遺骸常懷不忍之心茲肅無遮
之會伏願慧炬燭於潛壤法雲登彼沉魂使之捐蓬顆
之居往生樂國於此飽伊蒲之饌早脫迷津

金臺開堂疏

新會迺五羊壯縣金臺有諸佛道場須得當人式揚正

法某人解第一義續無盡燈道既心傳何惜逢塲作戲
機能口伐未嘗把纜放舡而今踢倒淨瓶休要橫擔拄
杖請升猊座為證龍華

仁王請長老疏

舉拂白槌須是捧頭有眼尋枝摘葉盡皆雪上加霜惟
仁刹之道場迺羊城之淨社當求覺者為闡宗風某人
末法律梁叢林耆傑迅機激電一喝可以接人挈行傳
燈三關端的繼祖願攜鋤斧坐斷禪床莫辭辛苦遠來

要看斬新拈出

請西竺長老疏

西竺近作名藍財去城一牛鳴外南方希有道眼誰進
步百尺竿頭丈室既虛真源曷振某人能判公案見許
作家遠遊寂寞之濱全無蘂苴之習幾年飛錫真箇得
魚忘筌今日拈槌定不向空釘櫬願聞一喝為破羣迷
雲封長老開堂疏

斬丁截鐵須還本分鉗鎚摘葉拈花不脫前來窠臼欲

宣妙旨允屬當人長老道價甚高叢林所許徹開闢揆
笑他鈍鳥棲蘆不墜宗風真箇泥牛吼月此百粵踐蛇
之境界乃六祖覆鉢之道場肯隨嶺上之雲為指庭前
之栢要看橫說豎說見得奇哉妙哉

代為母還水陸疏

佛起慈悲之心隨緣必應人有呻吟之苦修善或除微
十方賢聖之靈設三界冥陽之會伏念母氏嘗縈疾疢
浸閱冬春三折肱而知為醫曾弗達於良藥一舉足而

不忘母爰有禱於寶坊賴正覺之開顏致沉痾之去體
是修淨供不違本心伏望一切空虛四維上下瞻十地
坐蓮之相三乘皆具大乘聞五天譯貝之文一食為無
量食咸生歡喜為作證明所願福德川增灾殃冰釋數
口保團樂之樂四時消坎坷之憂

代為妻還水陸疏

居色界無色界之中愛纏未脫惟法聲非法聲所暨善
報相隨嘗祈大力之尊願肅無遮之會已叨慈蔭敢替

前言某昨以妻某氏欲火所然業山弗坦惟四大假合之妄未悟空花而十月滿足之時且臨坐草不賴諸佛菩薩孰憫一切衆生輒申合爪之私遂獲免身之吉偶微官之奔走致淨供之愆違伏望三界冥陽四維上下來飽毗耶之飯同作證明預聞優鉢之香悉皆清淨所願分光慧炬蒙庇法雲滌曩夙之過和崇來今之福利如是因如是緣如是果俾無六甲之虞歸依佛歸依法歸依僧更遊一丁之喜

薦張正甫疏

萍蓬無定共嗟旅食之窮人琴俱亡忽見佳城之閉仰
憑佛力少助冥途伏願洗滌宿塵除惡纏之煩惱濟登
彼岸瞻寶相之光明

薦亡婢趙氏疏

平生蘊德內外無有間言一旦遡幽俛仰已成陳迹追
色辭而結想仗梵唄以洩哀伏惟出帝王之後而不習
驕奢擅閨房之秀而能閑禮法獨居八載不踐二廷披

寶英而晨課有常受秘錄而齋居甚確世味真同嚼蠟
道心可謂斬丁故能一彈指間不覺三寸氣斷六姻無
不相弔七日又復如馳伏願慈蔭雲深惡纏氷泮如露
如電如夢幻夙悟斯言大雄大力大慈悲為躋彼岸

薦趙監廟疏

相隨曩日夙期事業之成一訣終天孰謂死生之隔供
桑門之淨侶演貝葉之妙文有賴慈悲為崇福德某人
襟靈開豁論議該通奧篇遠探於義農健筆仰師於韓

柳出名家而延賞舊矣奉祠逢近屬之來歸釋然讓爵
喜慍不形於色得喪莫累其心人之難能世所推重暨
叅佛祖頓悟禪宗地水火風了覺此身之妄夢幻泡影
豁超是觀之空念再世之契深在諸親而情厚忽聞音
訃采切哀悰不勝悲悼之私少仗莊嚴之助伏願濟慈
航於彼岸分法炬之餘光善纏惡纏煩惱纏悉皆解脫
我相人相衆生相益契真如

祖母周祥疏

日薄西山已愴含飴之遠律中南呂俄臻升穀之新顧
昔制之云終想慈顏而如在惟是一心之痛不勝五體
之投仰慧炬以無邊庶冥途而有助伏願幻塵席捲福
海航安諸如來舌相廣長遍覆色界非色界善女人耳
根清淨常聞法聲非法聲

祖母忌辰疏

望斷新阡阻一官於千里悲纏諱日驚再見於三秋雖

合爪以有祈曾含飴之莫報伏願

同前疏

祖父遠忌疏

幻心未滅孰知空果之非祖武是繩久痛靈根之殞適
臨諱日深切哀悰伏願法雨霑濡迷雲開豁尋光見佛
既不入於稠林如渡得舡遂即登於彼岸

亡妣忌辰疏

職叨丞郡記弧矢於初生養缺循陔痛杯圈而罔極適
際徭幽之日不勝追遠之情伏願借潤智淵分光慧炬
或因六十二見而造罪障盡得斷除不於三四五佛而

種善根遂生安穩

寧海薦亡妣疏

生我劬勞適至垂弧之地思其居處不勝吹棘之情痛
三釜以莫伸瞻六牙而有禱伏願慧燈分照法鼓聞音
清淨諸塵起蘊麝名香之想濟登彼岸生蓮花寶座之
中

樞弟水陸疏

人生如寄興哀棠棣之詩法力無邊邀福菩提之路肅

三界冥陽之會伸百年兄弟之情亡弟大資享壽不及
六旬邈幽已臨三七平生舉措或有誤於斯心厚夜沉
淪恐未登於彼岸痛深同產誠叩大慈淨供無遮共飽
毗耶之飯惡纏悉解願歸兜率之宮

諸子為母氏水陸疏

吹棘凱風痛益深於七子傷心素鞞禮遽決於三年永
惟罔極之恩虔卜無遮之供亡妣頃嬰末疾奄棄浮生
曜魄如馳驚再升於新穀杯園徒在愴久廢於長筵哀

戒有終助勞曷報雖平生之積善恐人世之多愆致尚
滯於迷津或未登於彼岸設三界冥陽之會徼四維上
下之靈願賜慈悲曲垂拯拔法雲敷蔭盡解脫於惡纏
慧炬分光即往生於樂國

盤洲文集卷七十